


VIJESTI

KUĆA GEODETA

"Nije teško slaviti kada se ima s kime radost podijeliti" riječi su druga Lukića izgovorene na svečanoj sjednici 26.10.1985.godine povodom otvaranja nove zgrade Geodetskog zavoda u Sarajevu.

Zaista, toga dana je bilo veoma svečano, a sa lica radnika Zavoda zračila je radost što su se uselili u svoj prvi dom, gdje će imati mogućnost rada i stvaranja.

To je bio dan radosti za sve geodete, pa i za direktora mr Vladimira Lukića, kome je, najzad, "pao kamen sa pleća", pošto sada radnici Zavoda imaju svoj poslovno-proizvodni objekat. Time su krunisani napori direktora Lukića, kao vodeće ličnosti oko izgradnje i opreme objekta



Nova zgrada Geodetskog zavoda u Sarajevu

U svome govoru direktor se zahvalio svim radnicima Zavoda koji su se odricali mnogo čega posljednjih godina da bi dobili svoju kuću, kuću gojedeta, kao što su to radili i radnici "Krajinapremjera" iz Banja Luke, koji su se godinu dana ranije uselili u svoju novu zgradu, preselivši se iz trošne barake u kojoj su poslije zemljotresa radili. Pomenuo je mnoge zaslužne, medju kojima članove Odbora za izgradnju kao i za čitavo vrijeme gradnje dežurnog Benačeka, te Bakšića, S.Karamehmedović i mnoge druge radnike Zavoda, nadzornog organa, izvodjača.

Lukić se takodje zahvalio i ljudima koji nisu iz Zavoda. Svakako da bez pomoći šire društvene zajednice objekta ne bi bilo. Odgovorni republički funkcioneri drugovi Renovica, Vranić, Dodik, Mutapčić, Pejić, Tomić, Lazarević, Šabić i drugi pomagali su onoliko kolika su bila njihova ovlaštenja. Glavno breme, istakao je Lukić, nosili su radnici Zavoda, koji su sticali dohodak, koji su završili premjer 50 odsto teritorija SR Bosne i Hercegovine, koji sada mjere daljnjih 26 odsto, koji će zagaziti i na ostali nepremjereni teritorij. Rame uz rame s njima bile su kolege iz Republičke uprave za geodetske poslove i katastar nekretnina, medju kojima se naročito ističu drug Omerbašić, nekadašnji direktor Zavoda, te drugovi Milišić, Tunguz, Karabeg, Hadžiahmetović i drugi.

U nastavku izlaganja direktor Lukić zahvalio je kolegama koji su se naročito zalagali oko izbora i uredjenja lokacije: Vuletiću, Dervišiću, Čizmiću, Krsmanoviću, Abazi, Nikoliću, Trklji, Starovički, Čupriji, Arsiću i drugim. Zahvalnost je odao i projektantima "Doma" i neimarima "GP Hercegovina" koji su mnogo doprinijeli funkcionalnosti, konfornosti i ljepoti objekta.

U današnjoj zgradi korisne površine oko 5.500 m<sup>2</sup>, koja je koštala oko 350.000.000 dinara, radnici Zavoda imaju daleko bolje uslove rada. Nova zgrada, istakao je Lukić, nije više san naš i onih kolega koji su dugo godina radili u Zavodu, a koji su otišli na druge radne zadatke, ali i danas ne mogu da zaborave geodetska drugovanja u Zavodu.

Na kraju je direktor Lukić poželio svim radnicima srećan i uspješan rad u novim prostorijama.

Blagoje Tunguz